



خايك لوجيستي

الجزء الأول

بابك الأول لعالم اللوجيستكس

اللوغيستي / فيصل عَدَّاس

بِسْمِ اللَّهِ الرَّحْمَنِ الرَّحِيمِ

خليك لوجيستي ©

ج1

بابك الأول لعالم اللوجيستكس

بقلم

اللوجيستي / فيصل عداس

الفصول

3	❖ مقدمة
6	❖ إيش معنى اللوجيستكس
8	❖ اللوجيستكس زي الطب
10	❖ مشروع فيراري
14	❖ العالم الوجيستي قدامك مفتوح
19	❖ وقت اللوجيستكس الآن
21	❖ علاقاتك اللوجيستية وأصحابك اللوجيستيين
24	❖ حلاوة اللوجيستكس
26	❖ إيش يعني "مشكلة لوجيستية" و "حل لوجيستي"
31	❖ المراكز والمعدات اللوجيستية
35	❖ كيف حنتواصل مع بعض



الفصل الأول

المقدمة

أهلا أهلا... اليوم حآخذك في رحلة سريعة في عالم اللوجيستكس. أنا فيصل أو ممكن تسميني اللوجيستي و هذا الاسم هو إلي ينادوني بيه أصحابي بعد ما صار كل شغلي في الحياة لوجيستكس. قصة كيف سويت علامة اللوجيستي هذه قصة خطيرة!! حكيها قريب باذن الله و حكي كيف كنت بسبح في البحر أيام بعد ما اترميت من سفينة كنت اشتغل عليها وكيف ربي ثبتني في وسط البحر و عشت على كسارة أيام

إلين ما خرجت بسلام الحمد لله و أنا هناك اعطاني هذا الاسم ووكلني إني أعطي هذه المهنة للجميع وأخلي اللوجيستكس في يد الكل ومن هناك بدأت قصة اللوجيستي. اليوم حآخذك معايا على عالمي اللوجيستي لأبغاك تشوف عالم جديد مايعرفه الا قليل. حتشوف عالم كله نشاط و حركة و ألوان و بسطة في كل الأمور. بعد ما تاخذ عنه فكرة أنا متأكد إنه حتبدأ تتكون صورة في مخك عن إيش تبغى تسوي في حياتك بالذات من ناحية الشغل. وأنا متأكد إنك حتشوف شي ما شفته قبل كده. وإيش رأيك لو أقلك إنك حتشوف اشياء كثير تعرفها بس في حياتك ما سميتها أشياء "لوجيستية" لأننا نحن اللوجيستيين في كل مكان و حوليك بس تقريباً متخفيين و القليل إلي يقدر يلاحظنا. إنت الآن حتصير من هذول القليل. هذا الكتاب كتبه عشان اعزمك لهذا العالم و سبحان الله جاء بين إيديك ووصلك. هذا يعني هو مكتوب لك. هذا يعني في شي في حياتك حتصير لك و إنت تحتاج تعرف هذا العالم. ممكن في مشروع الله كاتبه لك و عشان تنفذه لازم تعرف لوجيستكس. ممكن حتأسس شركة لوجيستية تتوسع فيها بين القارات و يصير عندك زباين في كل العالم. ما أعرف إيش مكتوب لك بس أعرف إنّه في شيء مكتوب عشان كده و صلك هذا الكتاب. بعد ما تقرأه ابغى اقابلك و اتعرف عليك. ابغى أعرفك و تعرفني و نتكلم زيادة و نحكي بعض قصص أكثر و نشارك معلومات و أفكار أكثر. هذا الكتاب إلي بين إيديك كتبه بنفسه و بطريقتي عشان

أبغاك كمان تتعرف عليا و تعرف ولو لمحة عن طريقة تفكيري و بعدين حعطيك
الطرق إلي حنتواصل فيها مع بعض في آخر الكتاب. الآن إمشي في الكتاب و شوف
المعلومات و شوية أسرار لوجيستية و حكيك كم قصة ليّة و عن هذا العالم و باذن
الله قريب حتعرف ليه وصل هذا الكتاب بين إيديك. ياالله على بركة الله نبدأ.




الفصل الثاني

إيش معنى لوجيستكس

شوف... المعنى بسيط جداً فاسترخي وافهمه من غير تعقيد. الآن شايف كل شي

حواليك؟ شايف هذا الكتاب إلي بين إيديك؟ كيف وصلك؟ تعرف كم عملية صارت

عشان يوصلك؟ خليني أوريك



شايف كل هذه العمليات إِي عليها علامة اللوجيستي. هذه كلها اسمها عمليات لوجيستية. كل اتصال صار و كل ورقة و فاتورة و رسالة وصلت و إترسلت بيني وبين المطبعة و المكتبات و المستودعات عشان تتحرك الكتب و تتغلف و تتخزن و كل اتصال و رسالة بين المستودعات و سيارات التوصيل هذه كلها عمليات لوجيستية. العقود إِي صارت بين كل هذه الأطراف نسميها عقود لوجيستية. فشايف كيف كلمة لوجيستكس داخلة في كثير أشياء. طيب إذا حبيننا نختصر كل هذا في تعريف بسيط لطيف نقدر نقول إِيه اللوجيستكس هو **"تخطيط و تنفيذ عمليات النقل و التخزين"** تخيل بس كم نوع عملية نقل و تخزين موجودة جُوا البلد و بين البلدان كل يوم. وتخيل كيف هذه العمليات بتصير في كل انواع الاشغال و القطاعات و كل انواع البضايح و مو بس البضايح حتى نقل الناس من مكان لمكان كل هذا اسمه لوجيستكس. يعني التعريف إِي قلناه ينطبق على البشر و على المنتجات و كمان ينطبق على المعلومات كيف تتخزن و تتوصل هذا اسمه لوجيستييات المعلومات. هذه كلها لوجيستكس. شايف قد إيش عالم اللوجيستكس غني و كبير. الآن ممكن تستوعب كيف إِيه اللوجيستكس حقيقتاً داخل في العالم كله. و كيف كل شي حوليك جاء بعمليات لوجيستية. شايف كيف كل شي لوجيستكس.



الفصل الثالث

اللوjistكس زي الطب

كيف الطب فيه طب عام و فيه إختصاصات و كمان في إختصاصات جُؤا إختصاصات. نفس الشي اللوجيستكس. في لوجيستكس بشكل عام و في إختصاصات. وفي إختصاصات لوجيستية دقيقة. حتشوف لوجيستيين يشتغلوا في إختصاصات دقيقة جداً لدرجة ممكن تشوف لوجيستي بس مختص في نقل الفلوس. بس شغلته كيف ينقل فلوس من بنك لبنك. هذا إختصاصه. زي كيف في دكتور بس مختص في جراحة

المخ و الأعصاب. مو إختصاص جراحة بس بل إختصاص جراحة بس في المخ و الأعصاب. يعني إختصاص داخل في إختصاص. حتشوف لوجيستي بس مختص و يشتغل في تخزين الدجاج أو التمور أو بس ينقل ااث و عفش و مفروشات. لأن زي الطب كيف كل إختصاص يحتاج معدات معينة و خبرة معينة دقيقة كمان في اللوجيستكس كل نوع منتج و بضاعة تحتاج نوع سيارات معينة و معدات معينة و خبرة دقيقة عشان هذي البضاعة تتخزن و تنتقل بأحسن و أسلم طريقة من غير ما تخرب. الإختصاصات اللوجيستية ما توقف. حتشوف لوجيستي مختص في السيارات. حتشوفه فاهم فيها ألف و هذا عالم حماس عل آخر. أنا أول مشروع سويته لحالي كان مشروع نقل سيارة وكان من أحلى المشاريع إلي أسويها. وحتشوف شركات لوجيستية كبيرة كل شغلها سيارات بس. خليني أوريك أول مشروع ليّة في السيارات اللي سويته مع فيراري و أعطيك لمحة سريعة عن هذا العالم الخرافي.



الفصل الرابع

مشروع فيراري

في يوم وأنا جالس في الشغل كلمني صاحبي عبدالله "كمان هو لوجيستي" و عنده الآن أحسن خدمة نقل دبابات إسمها موتوتو. هذا الكلام قبل ما يسويها. المهم يا صديقي كلمني عبدالله وقال لي "فيراري كلموني و يبغونا نقابلهم" كان معرضهم وقتها في طريق المدينة في جدة. وقال لي إنّه عندهم سيارة جديدة واصلّة و يبغونا نسويلهم خطة لوجيستية. طبعا قتلته "ياالله بينا". في الليل رحنا للمعرض و طلّعنا الدور إلي

فوق و جلسنا مع مدير التسويق و مدير المعرض. شباب عسل. يعني لطيفين. المهم... قالولنا إنه في فيراري جديدة البورتوفينو حتوصل قريب و يبغوا يودوها لبيوت عوائل أصلاً عندهم فيراريات و يحبوا الفيراري. يعني يبغوا يخلوهم يشوفوا البورتوفينو الجديدة في بيوتهم. خدمة لوجيستية فخمة و طبعاً أنا إتحمست ألف على الفكرة و قتلهم تمام بعد مافهمت بالضبط إيش يبغو. إسمع الفكرة... حنجيب البورتوفينو من دبي للرياض و في الرياض حناخذها لأربعين بيت. كلهم أصلاً أصحاب سيارات فيراري. بعدين حنجيبها على جدة و حنودها لأربعين بيت في جدة "وعندهم ليستة جاهزة حقت البيوت" بعدين حنرجع السيارة. وقالوا إنهم يبغوا شاحنة مقللة ينزل البوكس حقها كله على الارض عشان تسهل نزول و طلوع السيارة و يبغو الشاحنة عليها صورة الفيراري البورتوفينو و تكون أرضيتها حمرا زي لون السيارة. عشان يبغوها لمن تنفتح في بيوت الزباين تنزل السيارة كأنك في الأوسكار. و كمان قالوا هُمّ حيتكفلوا بالتصميم الداخلي للشاحنة لأنني عندهم واحد يتعاملوا معاه. يعني إحنا علينا كل العملية اللوجيستية "النقل بين المدن و التوصيل لكل بيت" و هُمّ عليهم التصميم. قلنا طيب أعطونا الليلة نعمل الخطة و نرسلكم عرضنا. خرجنا أنا و عبدالله بَرّا المعرض و جلسنا في السيارة و قال لي "فيصل إنت إستلم المشروع ... ما تحتاجني معاك" طبعاً هنا أنا إنفعلت شوية لأني متحمس على الموضوع و هوا عبدالله

إلي مكلمني. وأنا أعرف عبدالله كويس بيغالوا أيام دفعة عشان يتحمس و لمن يتحمس يعملك العجب في التنفيذ. بالعربي "فنان ألف". قتلته مستحيل أعمل المشروع من غيرك و إنت معايا يعني معايا و حنعمله مع بعض. أول ما شافني كدا قال لي "طيب أنا عندي واحد عنده نفس الشاحنة إلي بيغوها و هو أصلاً إختصاصه ينقل سيارات بين دبي و السعودية و دول الخليج بشكل عام وهو سوري و اسمه الأحذب " قتلته سوري و اسمه الأحذب! شكلوا جاي من باب الحارة دا... قَلِي لا ممتاز و فنان و يُعتمد عليه مية في المية و شاحنته هية المطلوبة. قتلته طيب ياالله نكلمه لأني الموضوع حياخذ أسبوع كامل شغل فحنحتاج واحد يكون معانا لمدة أسبوع فلابزم نحجزه. و كمان قَلِي شاحنته البوكس حقها ينزل كله على الأرض فيعني تماما زي ما فيراري تبغى. المهم قَلِي خليني أكلمه و أشوف جدوله. على حظنا الحمدلله وافق الأحذب على التلفون و قال أنا جاي جدة اشوفكم و نتفق واعطانا تكلفته لمدة اسبوع بين دبي و جدة و الرياض. وقتها بدأنا نشغل على عرض سعر رسمي لفيراري و وافقوا عليه بالتلفون فقلنا الحمدلله و وصل الأحذب جدة و رحنا محل بوظة سورية أكلنا هناك و اتفقنا هناك و اكتملت الدائرة كلها. وسوينا العقد مع فيراري و العقد مع الأحذب.

الآن صار وقت التنفيذ. أرسلنا الشاحنة لفيراري و جاء حق التصميم و سوينا كل التغييرات وصارت الشاحنة كأنك في معرض فيراري لمن تشوفها و لمن تفتح البوكس و تنزل السيارة كأنك في مهرجان البحر الأحمر. طلعت شي خرافي. و لمدة أسبوع أخذنا البورتوفينو من دبي للرياض ووصلناها لبيوت الزباين و بعدين جنبها لجدة و وصلناها لبيوت الزباين تقريبا عشرين مو اربعين و بعدين رَجَعْنَا السيارة. طبعاً كل هذا أنا و عبدالله جالسين في جدة بنتابع الموضوع على التلفون. بعد أسبوع تقريبا وصلتني حوالة من عبدالله بعد ما استلم المبلغ من فيراري و كانت احلى 6500 ريال استلمها وكان هذا أول مشروع لوجيستي أسويه بشكل خاص. مشروع الفيراري البورتوفينو. باختصار أنا سمعت فيراري إيش تبغى بالضبط بعدين سويت خطة لوجيستية, بعدين جمعت كل الأطراف إلي نحتاجهم لتنفيذ الخطة بعدين سويت عقد مع كل طرف و جلست اتابع التنفيذ الى أن إتفقت الخطة تماماً زي ما اتفقنا. هذا لوجيستكس. و فيراري إنبسطوا و زباينهم إنبسطوا و الأحذب إنبسط و أنا و عبدالله إنبسطنا و الحمد لله رب العلمين.



الفصل الخامس

العالم اللوجيستي قدامك مفتوح

الإختصاصات في اللوجيستكس ما أقدر أحصياك هيا في هذا الكتاب من كثرها. ممكن زي ما شفت في مشروع فيراري تصير لوجيستي مختص في السيارات ووقتها عُشاق السيارات حيصيروا زباينك و شركات السيارات تعتمد عليك. ممكن تختص بس في السيارات السريعة و الفخمة و يصير أصحابها يعتمدوا عليك لمن يبغوا يخزنوها أو ينقلوها جوا البلد أو يبغوها تسافر معاهم في إجازات الصيف لإسبانيا و فرنسا و لندن

زي ما تشوف دايماً سيارات سعودية هناك. ممكن لو تحب تصوير لوجيستي مختص في الخيول وهذه على فكرة نادرة جداً و الشغل فيها قوي جداً و مُربح على الآخر وإذا إختصيت فيها حتكون من القلائل إذا ما كنت الوحيد في منطقتك لأني أكثر أصحاب الخيول هم إلي يسؤوا اللوجيستكس بنفسهم لأني مافي احد يقدم هذي الخدمة. يعني على الاغلب إلي يقدموا الخدمة ينعذوا على الأصابع. ممكن تختص في نقل الخيول أو نقل الحيوانات بشكل عام "على الأغلب أسامة الدغيري سيكون زبونك الأول" و الله يعينك على الأسود إلي حيكونوا معاك في الاجتماعات. حتصير وقتها تنقل الحيوانات بالطائرات و الشاحنات و البواخر. على سيرة الطائرات ممكن تصوير لوجيستي مختص في الطائرات ونقل قطع غيار الطائرات. هذه أنا اشتغلتها في 2014 و هذا إختصاص مطلوب جداً و تسويه شركات لوجيستية صغيرة و كبيرة و فيها مكاسب ألف. خذها مني. فيها مكاسب طحينة "يعني كثير". طبعا المكاسب كبيرة في أي شي تختص فيه و تصوير فيه فنان و يعتمد عليك. إنتا صير فنان و لا تشيل هم المكاسب حتجيك جري. ممكن تختص في القهوة لو حبيت. تصوير تنقل القهوة و تخزينها و توصلها للمحلات و تشحنها من كل مكان في العالم. هذه لحالها حيصير عندك آلاف المحلات زباين يتعاملوا معاك. لأني محلات القهوة مو بس يحتاجوا قهوة. يحتاجوا يخزنوا صناديق الكاسات و البلاستيك إلي يستخدموه في المحلات ولأني

القهاوي ضيقة ما عندهم مساحة في المحلات فيحتاجوا لوجيستي يشيل الليلة. ممكن تصير لوجيستي مختص في الأزياء "فاشن لوجيستيكس". هذا عالم خرافي كمان. ولازموا فن في التعامل مع الملابس لمن تنقلها و تخزينها. حتى مستودعات الملابس تتصم من جوا بطريقة غير المخازن الثانية. وقليل مخازن عندنا مصممة للملابس بالذات فهذه نادرة كمان في البلد. ممكن تكون لوجيستي مختص في الأفلام هذا طبعا عالم غير طبيعي. تعرف كمية اللوجيستكس المطلوبة عشان فيلم واحد يخلص؟ لوجيستكس طحن! شي غير طبيعي. وإختصاص خرافي و نادر ألف. وأصلاً مع كل خبرتي الى الآن ما شفت لا شركة و لا مؤسسة ولا شخص لوجيستي مختص في الأفلام و الاستديوهات. على الاغلب كل استوديو بيعمل اللوجيستكس حقه بنفسه. هذا إختصاص مطلوب بالذات إنه صار التركيز أكثر على هذا العالم وحتطلع استديوهات ضخمة زي إيلي بيصير في نيوم و في كل المدن حتشوف تطور رهيب في الأفلام و الاستديوهات و التصوير و المواقع حتزيد كل يوم. فهذا واحد من الإختصاصات. ممكن تكون لوجيستي مختص في اللحوم. بسّ اللحوم. هذه لحالها فيها ميات ملايين الريالات شهريا تنصرف على تخزين و نقل اللحوم بين المستودعات و المحلات. لسا ما اتكلما عن الشحن الدولي للحموم. مئات الملايين بس جوا البلد. فلك أن تتخيل. و خذها مني من الآخر. نحتاج لوجيستييين عندهم كفاءة عالية في هذا الإختصاص لإته

يادوب أشوف كم شركة بتشتغله صح و بجودة عالية. أكثر إيلي شغالين فيه على قولهم "طَبِّبْ و لَيْسْ يَطَّلِعْ كُوَيْسْ". يعني تقدر تنافس و تفوز. فلو تدخل في هذا الموضوع ممكن تطير من كثر النجاح بالذات لو جودة شغلك عالية. فهذي السوق فيها مفتوح قدامك لا تحسب عشان في شركات كثير بتشتغل فيه يعني ما تقدر تدخل السوق. أنا اللوجيستي و بقولك إذا دخلت هذا الباب بجودة عالية وإيمان صح حتفوز فيه. بس توكل على الله. ممكن لو حبيت تصير لوجيستي مختص في الفعاليات "إيفينت لوجيستكس". هذه لحالها آلاف و آلاف المعارض و المؤتمرات و الملاهي و المواسم إيلي ما تنتهي و كمان مكاسبها ألف. زي ما إنت شايف ممكن أتكلم من هنا الى الأبد و ما أوقف عن قد إيش سوق اللوجيستكس قدامك مفتوح لأنني الإختصاصات ما توقف. لأنني اللوجيستكس في كل شي. لسا ما إتكلمنا عن لوجيستكس المواد الطبية و الزراعية و الصناعية "هذا مليارات مو ملايين" و لوجيستكس الإلكترونيات و لوجيستكس البناء و مواد البناء و لوجيستكس الإنقاذ و الأعمال الإنسانية "هذه خرافية" و كل وحدة من هذه فيها إختصاصات دقيقة. يعني بالعربي العالم كله مفتوح لك تختار و تختص في الشي إيلي إنت تحبه و تفهم فيه و حتصير تفهم فيه أكثر كل ما تشتغل فيه. لأن أحسن لوجيستي هو إيلي فاهم في إختصاصه. عشان كدة أنا اليوم بقدملك اللوجيستكس على طبق من فضة. بوزريك اللوجيستكس بشكل عام و منطبق قصة. و إنت حتعرف إيش

تحت تختص على حسب رأيك الشخصي. وقتها ممكن تصير لوجيستي فنان في
إختصاصك و عالم وخبير فيه. وقتها حنعمد عليك في الإختصاص إلي إنت تختاره.
بدايتك في اللوجيستكس حتكون زي بداية الدكتور في الطب. زي ماهو بيدأ دكتور
عام و بعدين يختص. إنت كمان حتبدأ اللوجيستكس بشكل عام بعدين تختص و تصير
لوجيستي محنك. لوجيستي ألف.



الفصل السادس

وقت اللوجيستكس الآن

سمعت قبل كذا لمن يقولوا عن العقار إنّه لو اشترينا الأراضى من زمان كان اليوم
 سيكون عندي ملايين. هذه نسمعها دائماً. الآن هو وقت اللوجيستكس. إليّ حيدخل فيه
 اليوم بعد سنين باذن الله كل الناس حتقول لو دخلنا في اللوجيستكس من زمان كنا
 حنكون كذا و كذا. الآن اللوجيستي بيحبلك هيا من بدري. تعرف كم مستودع مُبَرَّد
 حنحتاج في السنين الجاية؟ يمكن ضعف أو ثلاث اضعاف إليّ موجود اليوم. هذه إذا

مو أكثر كمان. الشركات الموجودة اليوم ما تقدر بنفسها توفر هذا كله. هذا أنا بتكلم بس في موضوع المستودعات والمُبرِّدة بس. الشركات إلّي موجودة اليوم ما تقدر بنفسها تضاعف عملياتها لإّته يادوب أكثرهم يديروا إلّي بين إيديهم. لإّتي المخازن يبالغها إدارة و تركيز و تعديل و تطوير و تدريب و تكاليف. بس إنت تقدر تبدأ بمستودع واحد على قدك. ولأنك شباب وطاقتك عالية تقدر تركز عليه و تستمتع فيه كمان. هذا غير لو قَدّمت خدمة بجودة عالية حتقدر تاخذ شغل من الطلبات الموجودة اليوم مو بس الجديدة إلّي جاية في الطريق. كمية الفنادق إلّي لازم نبنياها عشان إكسبو الرياض و كأس العالم و كمية السُّيَّاح إلّي حيدخلوا البلد و الرياض تبغى توصل ل 15 مليون مقيم يعني أكثر من ضعف إلّي عايش فيها أصلاً والحج والعمرة و و... هذا كله يحتاج مستودعات بشكل غير طبيعي وإحنا بلدنا تعتمد أكثر الاعتماد على المخازن المبردة والطلب عليها ما يوقف. لا من جد ما يوقف! هذا بس مثال واحد على المخازن المبردة. مابالك كل الاحتياجات اللوجيستية الثانية. عشان كذا أنا في هذا الكتاب بعطيك لمحة بس والحقيقة إنّه في عالم لوجيستي يُقَدَّر بالمليارات مفتوح أمامك. والآن وقتها. لا توقف لإّتي الآن وقتها.



الفصل السابع

علاقاتك اللوجيستية وأصحابك اللوجيستيين

كلوجيستي حتكون علاقاتك مع لوجيستيين كثير. زي الدكتور أصحابه دكاتره و المهندس أصحابه مهندسين. اللوجيستي حيكون كثير من أصحابه لوجيستيين. طبعا غير إنّه أنا وإنّ حتكون أصحاب. بس كمان في لوجيستيين غيري في البلد مو بس أنا اللوجيستي الوحيد. ممكن ما يكونوا فنانيين زي صاحبك اللوجيستي أبو طاقة زرقة إللي يعشق شي اسمه لوجيستكس "قصدي أنا" بس في لوجيستيين "جامدين قوي" على

قول عادل امام. حتكون علاقاتك مع لوجيستيين من كل الإختصاصات. وهذه العلاقات حتخليك تأسس أعمال و أشغال و تُدير مشاريع بطريقة ما كنت تتخيلها. تخيل إنّه حيكون عندك أصحاب منهم يقدر يشحنك أي شيء من الصين و من أمريكا و من أوروبا و من الهند و أصحاب إختصاصهم مستودعات و تخزين إذا إحتجت إنك تخزن أي نوع بضاعة في أي وقت باتصال واحد تقدر يكون عندك مخزن. و أصحاب ينقلولك سيارات و أصحاب تكلمهم إذا إحتجت توصل طلبات و أصحاب تكلمهم إذا إحتجت باخرة أو طائرة أو تشحن أي شي عن طريق البحر أو الجو أو البر و كل دا بتلفون يكون عندك. و إنت كمان حيعتمدوا عليك في إختصاصك. حتكون دائرة علاقاتك عبارة عن ناس لوجيستيين كل واحد منهم مختص و فَنَان في شغلته و حتقدروا تأسسوا أعمال لها أول و مالها آخر و تستفيدوا من خبرات بعض عشان تأسسوا أي شغل جديد أو تديروا أي مشروع مهما كان حجمه أو مهما كان مُعَقَّد. و كمان حتوصّلوا بعض بلوجيستيين ثانيين. فَمَثَلًا تَكَلِّم صاحبك تُقُولُهُ إِنَّكَ محتاج تشحن قهوة من كوستاريكا ويقولك "أنا ما أقدر بس أعرف لوجيستي دايمًا يشحن من هناك" و يوصِّلك بيه علطول و يسويك إلي حتتاجه. يعني دائرة علاقاتك حتكون غنية بناس كلهم إختصاصهم لوجيستكس. وهذه العلاقات حتزيد يوم بعد يوم و حتوصل لمرحلة لو حبيت تحرك جبل من مكان لمكان حتقدر بكم تلفون تربط كل الاطراف و تعرف

تكلفتك كم حتكون و متى و كيف تقدر تحرك الجبل. هذه قوة العلاقات اللوجيستية
وهذه القوة حتكون بين إيديك بإذن الله لأني هذا حيكون عالمك و اللوجيستيين حيكونوا
أهلك. عالم من اللوجيستيين. الله على هذا العالم اللطيف. سبحانك.



الفصل الثامن

حَلَاوَة اللوجيستكس

مِنْ أَجْمَلِ وَ أَكْثَرِ الْفَوَائِدِ الْخَفِيَّةِ لِمَنْ تَكُونُ لُوجِيَسْتِي وَ فَاهِمِ فِي اللُوجِيَسْتِكْسِ هُوَ إِنَّكَ حَتَّصِيرَ تَعْرِفَ تَأَسَّسَ أَيِّ شَرِكَةِ تَبْغَاهَا. أَيِّ شَرِكَةِ فِي أَيِّ إِخْتِصَاصٍ حَتَّعْرِفَ تَشْغَلَهَا. لِإِنَّكَ حَتَّكُونُ خَبِيرَ فِي التَّنْفِيذِ. لِإِنَّكَ تَعْرِفُ كَيْفَ تَنْقُلُ وَ تَخْزِنُ وَ تَخْطُطُ وَ تَدِيرُ الْإِمْدَادَاتِ. وَ هَذِهِ هِيَ الْأُمُورُ إِلَيَّ تَحْتَاجُهَا أَسْلًا عِشَانُ أَيِّ شَرِكَةٍ تَشْتَغَلُ وَ عِشَانُ أَيِّ مَشْرُوعٍ يَنْجَحُ. إِذَا تَعْرِفُ تَدِيرَ الْإِمْدَادَاتِ إِلَيَّ هِيَ النُّقْلُ وَ التَّخْزِينُ وَ تَعْرِفُ تَوْصِلُ

الأمر ببعض في أي مشروع فعلى الأغلب هذا المشروع حيصير سهل عليك. لو حبيت تشتري و تباع بضاعة مهما كانت و من أي مكان كانت فإننا كلوجيستي و خبرتك اللوجيستية و علاقاتك اللوجيستية حتعرف بكل بساطة تخطط لها و تنفذ كيف تشتريها و كيف تشحنها و كيف تخزنها و تحافظ عليها و حتجيب أحسن أسعار الشحن و النقل لأن علاقاتك في هذا العالم "ألف" و بعدين لَمَن تباع بضاعتك حتعرف كيف تجهزها و تغلفها و ترسلها للمشتري و كمان توصلها لباب بيته إذا حبيت. وفي أي نوع شغل هذه هي الأمور الأساسية. كل شيء ثاني زي إدارة الحسابات و التسويق و المواقع الإلكترونية تقدر تتعلمها بسرعة أو تتعامل مع مختص أو توظف شخص يسويها. الأمور اللوجيستية هي الأمور إيلي لو اتقنتها معناها أساس أي شغل صار سهل بالنسبة لك. حتصير خبير في كيف تسوي أي نوع شغل وأي نوع مشروع. وهذا كمان لإنك و إنْتَ بتشتغل حتواجه كل هذه الأمور. إذا اشتغلت في شركة في قسم اللوجيستكس أو اشتغلت في شركة لوجيستكس أو سويت شركة بتقدم فيها خدمات لوجيستية للغير في كل هذي حتواجه كل أنواع الخبرات المختلفة و حتعرف كل صغيرة و كبيرة في أمور تشغيل الشركات. عشان كدة إنك تكون لوجيستي هو قوة خفية تسمحلك تسوي أي شيء في هذه الحياة بإذن الله.



الفصل التاسع

إيش يعني

" مشكلة لوجيستية " و " حل لوجيستي "

هذي الكلمات ممكن تسمعها في الأخبار أو في إدارة الشركات أو من مدراء المشاريع.

وأنا كالعادة حعطيك معناها بأبسط طريقة و حتصير تفهمها على الطير أول ما

تسمعها.

تتذكر لمن قلنا إنني معنى لوجيستكس بشكل مبسط هو "اللوجيستكس هو تخطيط و تنفيذ عمليات النقل والتخزين" طيب خلي التعريف هذا في راسك. طيب لو حبيت تجيب مقاضي للبيت... هذه الآن عملية نقل صح؟ طيب تخيل إنه فجأة اكتشفت إنه مافي سيارة! يعني ما عندك وسيلة "نقل" تجيب فيها المقاضي. هذه اسمها مشكلة لوجيستية. لأنني عندك مشكلة و عائق في "النقل". يعني نقدر نقول إنه المشكلة اللوجيستية هي "أي عائق في نقل أو تخزين أي شيء". ياخي والله شرحي حلو سبحان الله. طيب الآن مافي سيارة صح... إيش "الحل اللوجيستي"؟ عشان نقدر نجيب المقاضي يا إما تطلب أونلاين "هذا حل" أو تكلم أخوك أو صاحبك يُمِر عليك "هذا حل" أو تروح مشي أو تطلب أوبر أو أي طريقة تسويها عشان تروح تجيب المقاضي. أي طريقة حتسويها هذي حتكون "الحل اللوجيستي". فنقدر نقول إنه الحل اللوجيستي هو "أي حل نستعمله لنقل أو تخزين أي شيء" طبعا هذه تعريفات مبسطة و ممكن نخليها مفصلة أكثر بس خلينا على هذي اليوم. فيعني الآن المشكلة اللوجيستية هي أي سبب أو عائق يسبب قطع الإمدادات زي إنه المقاضي هي إمدادات لأهل البيت و الحل اللوجيستي هي أي طريقة تسويها أو تخترعها أو تبدعها عشان تجيب الإمدادات وإلي كانت في المثال إلي ضربناه هي أي طريقة تستعملها عشان تجيب مقاضي. مثال ثاني شخصي كمان. تخيل إنك رُحت إشتريت تلفزيون 100 بوصة لإنك نفسك

تعيش كأنك جُؤا السينما. و التلفزيون ما يكفي تنقله في سيارتك الفيراري البورتوفينو الحمرا إلی وَصَلَّكَ هِيَّا اللوجيستي. بس تخيل ياخي! هذه الآن مشكلة لوجيستية. وسيلة النقل إلی معاك ما تكفي البضاعة. إيش حتسوي؟ يا إما حتسأل إلی في المحل إذا ممكن هُمَّ يوصلوا التلفزيون لبيتك أو تشوف دباب بَرَّا المحل تدفعوا يمشي وراك للبيت أو تكلم صاحبك عنده سيارة كبيرة هذي ثلاث أمثلة لحلول لوجيستية لمشكلاتك اللوجيستية إلی بتواجهك الآن. أعتقد الآن وضح معنى المشكلة اللوجيستية و الحل اللوجيستي. طبعا في أمثلة على مشاكل لوجيستية في عالم الاعمال و الصناعة و غيرها معقدة و لكن كلها نفس الفكرة. في أمثلة و مشاكل لوجيستية و حلول على مستوى كبير خليني أعطيك لون من ألوانها عشان تترسخ الفكرة أكثر. تخيل تبغى تبني فندق في جزيرة. زي مشروع البحر الأحمر مثلاً. بس من خيالك كم كيس إسمنت نحتاج نوصل للجزيرة في وسط البحر؟ كمية الحديد إلی لازم نوصلها و المعدات و الناس إلی لازم نوصلهم و لازم يناموا هناك و نسوِّيلُهُمَّ غرف و أكلهم و شربهم. كم محول كهرباء و ديزل نحتاج و كيف حنوصلها للجزيرة إذا مافي مرسى فيها عشان القوارب توقف و تنزل البضائع. هذه كلها مشاكل لوجيستية لازم نشفلها حلول. طبعا سيكون في كمية حلول لوجيستية كثير منها إته نجيب قوارب و بواخر و نبني مرسى في الجزيرة و نسوي شوارع عشان المعدات تمشي و ننقل بيوت جاهزة عشان

الموظفين و نقل أكل و شرب كل يوم إلين نسوي مستودع بسيط في الجزيرة و نقل ديزل عشان الكهرباء. شايف هذه كلها حلول لوجيستية. طبعا عشان نقدر ننفذ أكثر هذه الحلول في عندنا معدات حنستخدمها نسميها معدات لوجيستية حعطيك نبذة عنها باختصار بعد شوية. و كلها إنتا تعرفها أصلا بس ما كنت تسميها معدات لوجيستية. وفي شركات بس إختصاصها توفير المعدات اللوجيستية. وفيها مكاسب كبيرة جداً كمان. حعطيك آخر مثال لمشكلة و حل لوجيستي من أحلى الحلول إلي شفتها و كانت في مدينة أبها البهية اللي تخلي العجوز صبية... إسمع هذه. كنت في أبها رايح أحضر مناسبة مع زوجتي اللوجيستية "على فكر نحن عائلة كلها لوجيستية و أنا عرفت زوجتي في اللوجيستكس". المهم أنا جالس في بلكونة فندق قصر أبها شفت جبل بعيد فوق الجبل شفت طيارة. في البداية مافهمت أحسبها طيارة بعدين اكتشفت إنّه واقفة فوق الجبل. ناديت زوجتي و قلتها شوفي. المهم شافت و نفس الشئ ما صدقت و كلمت أبوها تسألّه عن الطيارة و قالها إنّه هذه طيارة إشتراها واحد في أبها من الخطوط السعودية و فكرته إنّه يعملها مطعم و حب إنّه يحطها فوق الجبل. ضربت في مزاجه يخليها فوق الجبل. طيب الآن المشكلة اللوجيستية اللي واجهته هي كيف حنوصل الطيارة فوق قمة الجبل؟ اكيد ما حنطير و نهبط على الجبل صح؟ صح. تعرف إيش كان الحل؟ هو حل بسيط صراحة بس حلو. فككوا الطيارة! و طلعوها

فوق الجبل قطع صغيرة و بعدين ركبوها فوق الجبل. هذا حلُّهم اللوجيستي. و الطيارة وصلت لفوق الجبل. هذا حل إبداعي و مو ضروري كل حل لوجيستي يكون حل تقليدي. ممكن تبديع و تسوي حل جديد و فكرة غير تقليدية الأهم إنك تحل المشكلة اللوجيستية. و حتشوف إنّه من أجمل أوقاتك في عالم اللوجيستكس كلوجيستي هو لمن تواجه مشكلة لوجيستية و تعصرمخك إلين ما يطلعك حل جديد إبداعي. حتس كأنك إخترعت اختراع جديد. كمان لا تنسى إنْ خبرتك في اللوجيستكس حتخليك تشوف حلول كثيرة و هذا لحاله حيلي عندك مخزون من الحلول اللوجيستية تستعملها في مختلف المواقف و في كمان معدات لوجيستية كثيرة حتساعدك عشان تسوي حلول لوجيستية تحل فيها مشاكل لوجيستية كثير. زي في الطب كيف عندهم معدات طبية إحنا في اللوجيستكس عندنا معدات لوجيستية. تعال معايا أعطيك فكرة عن كم وحدة.



الفصل العاشر

المراكز والمُعَدَّات اللوجيستية

زي ما تشوف في كل إختصاص حتلاقي عنده مراكزه و محلاته و معداته كمان اللوجيستكس عنده مراكز و محلات و معدات وعلى الاغلب إنت تعرف أكثرها بس ممكن ما لاحظت أو سميتها مراكز و معدات لوجيستية. كيف تشوف في عالم الطب عندهم عيادات و مستشفيات و مراكز طبية ضخمة و صيدليات و مختبرات و اجهزة و أدوات طبية زي أجهزة الأشعة و الإبر و كل هذه الاشياء. في عالم اللوجيستيكس مراكزنا هي المستودعات و المطارات و محطات القطارات و الموانئ البحرية و مواقف السيارات و الباصات و الشاحنات. و عياداتنا هي المكاتب السياحية و مكاتب

الشحن. ومن أدواتنا اللوجيستية و المعدات اللوجيستية هي الطائرات و الشاحنات و القطارات و البواخر و الرافعات إلي تشوفها في مواقع البناء في منها كبير و صغير. فعالم اللوجيستكس قُدَّامك إنتَ شايفه بعيونك كل يوم بس اليوم حتسميه لوجيستي. المطارات كلها مراكز لوجيستية. عن طريقها نقل الناس و البضائع. وزِيَّها الموانئ نقل فيها البضائع و كمان عندنا بواخر للناس و محطات القطارات نفس الشيء و محطات الباصات و الشاحنات كل هذي مراكز لوجيستية. و عندنا معدات كثير نستعملها زي الرافعات و السيور إلي نرفع فيها الشنط و كمان في سيور للناس زي إلي تشوفها في المطارات و الأدرج الإلكترونية. الرافعات مثلا تشوفها في الشارع دائما هذه معدة من معداتنا منها كبير جداً يشيل أوزان ثقيلة ويرفعها إرتفاعات عالية وفي منها بحجم الدبابات نستعملها جُورًا المستودعات نسميها رافعات شوكية. أنا لمن أزور مستودع من مستودعاتنا أكثر شي أحب أسويه إنَّه آخذ رافعة أتمشى فيها بين البضائع زي الطفل المبسوط بلعبة يتمشى فيها. و آخذ كم صورة أرسلها للوجيستية. الباصات و الشاحنات وحتى السيارات و الدبابات في اصلها كلها تعتبر معدات وآلات لوجيستية نقل فيها الناس و البضائع. الطائرات في منها طائرات بس للبضائع و في طائرات للناس و البضائع في نفس الوقت زي إلي تركب فيها عادةً لمن تسافر هذه نخط البضائع في الدور إلي تحت الكراسي مع الشنط. كمان البواخر نفس الشيء و القطارات.

في أي شيء في عالمنا اللوجيستي نستخدم آلاتنا للبضائع و للناس. واللوجيستيين والشركات اللوجيستية في منها مختصة في شي واحد زي العيادات حقت الدكاترة. كيف في عيادة أسنان بس. كمان حتلاقي في شركة لوجيستكس بس تنقل طالبات للجامعة مثلا. وفي شركات لوجيستكس بس تخزين لحوم. و في مؤسسات لوجيستكس بس تنقل دبابات زي مؤسسة صاحبي عبدالله إلي سويينا مع بعض مشروع فيراري. شوفها في انستجرام "موتوتو" و إسألها مين سواله العلامة حفته. و في شركات لوجيستكس زي المستشفيات. كيف المستشفيات تجمعلك إختصاصات كثير. كمان في شركات لوجيستكس عشرة إختصاصات لوجيستية. تلاقىها تشتغل في الشحن البحري و الجوي و البري و تخزين لحوم و إلكترونيات و عندهم خدمات في أكثر من تخصص. حتشوف كل أنواع الشركات و في انواع كثير. فعالم اللوجيستكس بحر واسع وأنا اليوم موهدي تحفظ هذا العالم بكل جوانبه. بس أبغاك تاخذ عنه فكرة واضحة و يكون صورة اللوجيستكس واضحة عندك. وإذا عندك أسئلة معينة عنهُ زورني في مواقع و أرسلني سؤالك عشان أجابك. أبغاك تعرف عالم اللوجيستكس إلي في أغلب الأوقات بيشتغل من وراء الستار عشان كل هذه البضائع إلي حوليك تكون متوفرة عندك و يوفر إحتياجات كل البشر زي و زيك. هذا العالم لفترة طويلة ما أحد إتكلم عنه بوضوح لأنه كبير و صعب حصره بس اليوم وصلك و إلي جايبك

أكثر. عشان تعرفه زي ما أنا أعرفه لازم تمشي فيه. بس الآن صار عندك نُطْف كثير و ثمرة عن معانيه و الحمد لله إنه الله فتحه لك عن طريق اللوجيستي. إعتبر هذا الكتاب كأنه دعوة لك تكتشف هذا العالم اللطيف القوي إلي كل يوم حتشوف فيه شي جديد و باذن الله كل يوم حَبِيئُه لك أكثر و أكثر. هذا العالم إلي إذا إختصيت فيه حيصير عندك قوة تسمح لك إنك تعيش حياة تأسس فيها أي شغل تحبه و تفكر فيه. حياخليك تسوي إلي في خيالك حقيقة أمامك. شي على بالك حابب تنفذه حتقدر باذن الله. وأنا شغلي إني أعطيك هذا العالم على طبق من فضة وهذا الكتاب هو أول طبق. و كمان حعطيك المعدات إلي تحتاجها عشان تفهمه كويس و تعرف تمشي فيه. وإذا حسيت نفسك ضايع في موضوع إسألني و باذن الله حَدُّكَ على الإجابة. إسألني عن طريق حسابات اللوجيستي و باذن الله نتقابل و نتعرف على بعض شخصياً و نتكلم أكثر و أكثر. و بعدين حتصير إنت اللوجيستي إلي الناس تعتمد عليه و ترجعه لمن تحتاج لوجيستي. فَحَلِيكَ لوجيستي.



كيف حنتواصل مع بعض

طبعاً لازم نتقابل و نتكلم بإذن الله وجهاً لوجه والى هذا اليوم أنا سويت حساب على الإنستجرام عشان نتواصل فيه. حَنَزَل فيه كل شي جديد و بالذات عشان تعرف إذا حكون في مكان معين عشان نتقابل إذا قدرت تتواجد فيه. حَظ في الحساب الأخبار و كل جديد بإذن الله. و كمان بإذن الله حشتغل إني أعمل لقاءات أكثر عشان أشارك هذا العالم مع أكثر قدر من الناس و ننشر عالم اللوجيستكس مع الجميع. و إنتَ كمان إذا في معلومة معينة تبغاها أرسلني علطول. ممكن في شي تبغى تعرفه أنا لسا ما إتكلمت عنه أرسلني عشان أعرف و إن شاء الله حرسلك بأسرع وقت ممكن. خلينا على تواصل و بإذن الله الله يفتح عليك هذا العالم اللوجيستي و يخليك لوجيستي.

أخوك

Instagram: @allogisty

Website: www.allogisty.com

اللوجيستي / فيصل عداس

والحمد لله رب العلمين

هذا الكتاب جُعِلَ لِي حابب يدخل عالم اللوجيستكس. و يكون عنده فكرة عن القوة اللوجيستية و قوة هذه المهنة. هذا الكتاب هو الباب الأول لهذا العالم. كتبته لكم بطريقتي و بشكل تفهموه ببساطة. فلا يوجد شي في هذا العالم معقد اذا عرفنا نوصله ببسر و سهولة. اعتبر هذا الكتاب مدخل لك لهذا العالم و باذن الله نكون على تواصل مستمر.

تحياتي...

اللوغيسيستي / فيصل عداس

Instagram: @allogisty

Website: www.allogisty.com